

Cenn@d

GORFFENNAF 24 2024 YN CYNNWYS Y GOLEUAD A SEREN CYMRU RHIF 178

Undeb Croes-goch 2024: Adeiladaf fy Eglwys



Arweinydd, Llywydd ac organyddes y Gymanfa Ganu



Mwynhau yn "Noson y Seren"

Cynhelir Cyfarfodydd Blynyddol Undeb Bedyddwyr Cymru mewn lleoliadau gwahanol bob blwyddyn ac eleni, gyda'r Parchg Geraint Morse yn cael ei urddo fel Llywydd yr Undeb, fe'u cynhaliwyd yng Nghroes-goch, sir Benfro, ar wahoddiad eglwysi'r ofalaeth. 'Adeiladaf fy Eglwys' oedd thema'r gynhadledd a chaed ymdrech arbennig i ymestyn allan i'r gymuned wrth i'r cyhoedd gael eu gwahodd i'r oedfaon cyhoeddus a'r gweithgareddau mymlog.

Oedfa Gymun a Chymanfa Ganu: Dechreuodd y dathliadau fore Sul, 23 Mehefin, pan ddaeth cynulleidfada dda o eglwysi sir Benfro a thu hwnt ynghyd i Oedfa Gymun Undebol yng nghapel Croes-goch dan ofal y Parchg Geraint Morse. Yn ei bregeth, cyfeiriodd Geraint at 'Edrychiadau'r Cymun', sef edrych yn ôl; edrych i mewn; edrych i fyny at Iesu; edrych o gwmpas wrth feddwl am eraill; ac edrych ymlaen i'r dyfodol mewn ffydd.

Yn yr hwyr cafwyd canu ysbrydoledig pedwar llais mewn Cymanfa Ganu o dan arweiniad Ms Gwawr Owen, merch-yng-nghyfraith cynweiniog Harmoni, Pen-caer, y diweddar Barchg John Roberts. Organyddes Harmoni, Mrs Valerie Llewelin, oedd yn gwasanaethu wrth yr offeryn a chafwyd eitem gerddorol gan fechgyn yr ardal. Dewiswyd emynau oedd â chysylltiadau â sir Benfro neu â'r Bedyddwyr, ac fe gafodd yr oedfa ei recordio ar gyfer *Caniadaeth y Cysegr*. Gwnaed casgliad tuag at Apêl UBC/CC Talentau Gobaith Zimbabwe.

Dwy daith a barbeciw: Bore dydd Llun, 24 Mehefin, cynhaliwyd taith gerdded o gwmpas arfordir sir Benfro, dan arweiniad Megan Pratt. Ac yn y prynhawn bu taith arall o gwmpas yr Eglwys Gadeiriol o dan arweiniad Cyn-escob Tyddewi, y Gwir Barchedig Wyn Evans. Daeth tyrfa dda ynghyd ar gyfer 'Noson o dan y Seren', sef barbeciw ym Mragdy Fferm Harglodd Uchaf, Tyddewi. Y grŵp lleol Gelert fu'n diddanu, a denwyd llawer o bobl na fyddai fel arfer yn mynychu capel neu eglwys i'r digwyddiad. Yn ystod y noson cyflwynwyd tystiolaeth am yr Arglwydd Iesu gan Hannah Smethurst, Jasper Natarajan a Christian Tucker-Williams.

Yr Eisteddiad Cyntaf: Ysgrifennydd Eglwys Croes-goch, Mr Alun Thomas, estynnodd groeso i gynrychiolwyr yr eglwysi i Eisteddiad Cyntaf y Gynhadledd fore Mawrth, 25 Mehefin. Agorwyd y cyfarfod mewn defosiwn gan Arolygwyr Cymanfa Penfro, y Parchg Eirian Wyn Lewis, a chadeiriwyd y cyfarfod busnes gan Lywydd yr Undeb,

Mr Bill Davies. Cyfeiriwyd at waith pwyllgorau, byrddau, cynghorau a chorfforaeth yr Undeb, a phob un adroddiad yn dyst fod Duw yn parhau i adeiladu ei eglwys.

Cymeradwywyd cais Cymanfa Dinbych, Fflint a Meirion i wrthwynebu cynlluniau i godi gorsaf radar ddadleuol ar gyfer y gofod yn sir Benfro. Bwriad y Weinyddiaeth Amddiffyn oedd codi 27 o ddysglau radar ar safle presennol Baracs Cawdor ym Mreudeth ar Benrhyn Dewi fel rhan o gynllun DARC (Deep Space Advanced Radar Capability). Un o brif ddibenion y cynllun fyddai dod o hyd i loerennau gwledydd eraill yn y gofod er mwyn eu dinistrio. Afraid dweud y gallai hynny arwain at nifer o ganlyniadau peryglus. Yn ystod yr Eisteddiad cafwyd cyfle hefyd i gyfarfod â Chyfreithiwr Mygedol newydd yr Undeb, sef yr Athro Iwan Davies, ac i dderbyn diweddariad am Apêl Talentau Gobaith yr Undeb/Cymorth Cristnogol. Yn ogystal, cyflwynwyd y darpar Is-lywydd, sef y Parchg Rob Nicholls, a estynnodd wahoddiad i bawb i Gyfarfodydd Blynyddol yr Undeb 2025 yn Eglwys Gymraeg Canol Llundain.

Cyflwyno cyfrol a chylchgrawn: Dymuniad a gweledigaeth y Parchg Geraint Morse oedd cyfieithu'r gyfrol *How to Pray* gan Pete Greig i'r Gymraeg, ac o ganlyniad i haellioni cyfaill iddo o'r enw Mac Ransom, llwyddwyd i sicrhau hynny. Cyflwynwyd copïau i Geraint a Mac gan y Parchg Aled Davies, Cyhoeddiadau'r Gair. Braint hefyd ar ran pwyllgor *Cristion* oedd cyflwyno tri golygydd newydd y cylchgrawn, sef y Parchedigion Sian Elin Thomas, Heulwen Evans a'r Bnr Eurfyl Lewis. Cyflwynwyd rhifyn cyntaf *Cristion* ar ei newydd wedd i'r tri golygydd gan y Parchg Judith Morris, Ysgrifennydd Cyffredinol yr Undeb.

Yr Ail Eisteddiad: Adroddiad 2041: Yn 2021 paratowyd dogfen gan yr Undeb, sef Adroddiad 2041, oedd yn creu darlun ystadegol o sefyllfa debygol eglwysi'r Undeb ymhen rhyw ugain mlynedd. Yn ystod y flwyddyn cynhaliwyd cyfarfodydd arbennig gyda phob Cymanfa a bu hynny'n destun trafod yng nghyfarfod y Cyngor. Rhoddodd Dr Christian Williams, y Parchg Simeon Baker a'r Athro Iwan Davies ddiweddariad ar y camau nesaf, sef y bwriad i greu Sefydliadau Corfforaethol Elusennol Rhanbarthol er mwyn sicrhau cyrrff a fyddai'n addas ar gyfer cefnogi gwaith cenhadol y dyfodol ac i ddiogelu'r Cymanfaoedd.

[\(parhad ar y dudalen nesaf\)](#)

Undeb Croes-goch 2024: Adeiladaf fy Eglwys
(parhad o dudalen 1)



Golygyddion newydd *Cristion* gyda Judith Morris ac Aled Davies

Darlith y Gymdeithas Heddwch: 'Apêl Heddwch Merched Cymru: Hanes Ddoe, Heriau Heddiw' oedd testun cyflwyniad Siân Wyn Siencyn a Siân Howys. Cyn cyflwyno'r siaradwyr gwadd offrymmodd y Parchg Denzil John, Cadeirydd y Gymdeithas Heddwch, weddi dros heddwch yn ein byd. Yn ystod y ddarlith soniwyd am yr Ymgyrch Heddwch a sefydlwyd gan ferched Cymru yn 1923 pan gasglwyd yn agos i bedwar can mil o lofnodion a'u gyrru mewn cist i America er mwyn apelio ar ferched America i weithio dros fyd heb ryfel. Roedd y gist bellach wedi dychwelyd i Gymru a'r cynnwys yn cael ei ddiogelwedd.

Croesawu Cynrychiolwyr yr Enwadau: Hyfrydwch oedd gwahodd cynrychiolwyr yr enwadau eraill i'r pryd hwyrol a gynhaliwyd yng Nghrug Glas. Estynnwyd croeso gan y Llywydd i'r Parchg Richard Gillon, yr Eglwys Fethodistaidd; y Parchg Jeff Williams, Llywydd Undeb yr Annibynwyr Cymraeg; y Parchg Jill-Hailey Harries, Llywydd Cyngor yr Eglwys Rhyddion; a'r Parchg Ddr Angharad James ar ran yr Eglwys yng Nghymru. Derbyniwyd ymddiheuriad oddi wrth y Parchg Aneurin Owen, Llywydd Eglwys Bresbyteraidd Cymru. Y Parchg Jill-Hailey Harries fu'n enau drostynt gan ddiolch am y croeso.

Oedfa'r Llywydd: Daeth cynulleidfya dda ynghyd i Groes-goch ar gyfer Oedfa'r Llywydd. Y Llywydd cyfredol, Mr Bill Davies, oedd yn gyfrifol am groesawu pawb i'r oedfa a chymerwyd at y rhannau arweiniol gan y Parchg Isaias Grandis, gweinidog Adulam, Felinfoel, Seion Llanelli a Salem Llangennech. Y Parchg Judith Morris, yr Ysgrifennydd Cyffredinol, oedd yn gyfrifol am drosglwyddo'r llywyddiaeth i'r Parchg Geraint Morse ac offrymwyd yr Urdd Weddi gan y Parchg Simeon Baker, Cyfarwyddwr Cenhadaeth. Yn ei anerchiad fe'n heriwyd gan y Llywydd newydd, y Parchg Geraint Morse, i ystyried a oedd yna ddyfodol i Eglwys Iesu Grist yn yr oes seciwlar, ôl-Gristnogol hon. Drwy nifer o ddarluniau trawiadol, cafwyd sicrwydd ganddo fod Eglwys Iesu Grist yn gwbl ddiogel am fod nerth yr Ysbryd Glân o'i phlaid ac o'i chwmpas fel mur o dân; yr oedd Iesu'n caru ei bobl a'i eglwys fel y carai priodfab ei briodasferch a byddai'r etifeddiaeth yn parhau'n drysor gwerthfawr trwy achubiaeth a gras Duw. Gwnaed offrrwm tuag at Apêl Zimbabwe yn ystod yr oedfa a chyhoeddwyd y fendith gan y Parchg Rhosier Morgan.

Defosiwn Agoriadol Dydd Mercher: Atgoffwyd pawb yn y defosiwn gan y Parchg Ddr Rhys Llwyd am y graig yr adeiladwyd yr eglwys arni a'r modd y cafodd Pedr ail gyfle gan Iesu o flaen tân golosg ar y traeth i ailgysegru ei alwad deirgwaith yn dilyn yr atgyfodiad. Dengys hyn nad oes rhaid i gamgymeriadau ddoe ein diffinio ac mai trwy fod yn gyfeillion agos i'r Iesu y gellid adeiladu ei eglwys yn yr oes hon.

Y Sesiwn Genhadol: Tystiolaeth bellach o Dduw'n adeiladu ei eglwys oedd yr hyn a fynegwyd gan y Parchg Simeon Baker, Cyfarwyddwr Cenhadaeth, a Sioned Graves, Swyddog Cenhadaeth, ar sut y gellir manteisio ar gyfleoedd i genhadu wrth daflu'r rhwyd



Hannah Smethurst yn cael ei chyfweld gan Sioned Graves

i ochr arall y cwch. Newyddion i ymfrydu ynddo oedd clywed fod dau a fu'n aelodau o'r Tîm i Gymru 2018, cynllun a roddai gyfle i ieuencid ddarnad galwad Duw ar eu bywydau, ar fin cael eu hordeinio i'r weinidogaeth. Bu'r sgwrs gyda Hannah Smethurst, un o'r ddau ymgeisydd, yn fodd i godi calon. O gofio'r pwysigrwydd o gyrraedd pobl yn eu cymunedau, braf oedd clywed gan y Parchg Geraint Morse am y cynllun i blannu eglwys yn nalgylch Ysgol Caer Elen, Hwlfordd. Hyfrydwch hefyd oedd clywed am lwyddiant y penwythnos 'Esgyn' ar gyfer ieuencid a dangoswyd ffilm fer a oedd yn rhoi blas o'r gweithgarwch. Nododd y Parchg Sian Elin Thomas, un o arweinwyr y penwythnos bod 33 o bobl ifainc wedi mynychu'r digwyddiad gyda 10 ohonynt yn dod o sir Benfro. Daeth y sesiwn ysbrydoledig i ben gyda chyfweliad â'r Parchg Andrew Settatree, un a fagwyd yn sir Benfro, ond a oedd bellach wedi dechrau gweinidogaethu yn Eglwys Hope/Gobaith Llanelli.

Cyflwyniad Mudiad y Chwiorydd: Roedd brwdfrydedd ac ymroddiad y Chwiorydd yn brawf o'u hymdrechion i adeiladu Eglwys Dduw. Adroddodd y Llywydd, y Parchg Sian Elin Thomas, am ei phrofiadau fel caplan Glyn Nest gyda Ruth Davies ac Eleri Lloyd Jones yn sôn am eu hymweliad bendithiol â Chynhadledd Chwiorydd Bedyddwyr Ewrop yn Riga, Latfia, ym mis Hydref. Estynnodd y darpar Lywydd, y Parchg Deb Stammers, wahoddiad cynnes i bawb i Gyfarfodydd Blynyddol y Mudiad yn Llannerch-y-medd ar 11 Medi eleni.

Oedfa'r Weinidogaeth: Bu'r oedfa hon nid yn unig yn gyfle i estyn croeso i weinidogion newydd ond hefyd i gofio'n annwyl am y gweinidogion a fu farw yn ystod y flwyddyn a aeth heibio. Bu'n gyfle hefyd i glywed neges arbennig a chofiadwy gan y pregethwr gwadd, y Parchg John Treharne, Tabernacl, Llwynhendy. Cododd ei destun o I Pedr, pennod 2, a ddarllenwyd gan y Parchg Aled Maskell ar ddechrau'r oedfa, darn a oedd yn cyfeirio at y maen a wrthodwyd gan yr adeiladwyr ond a ddaeth yn brif gonglfaen i'r bobl. Atgoffwyd pawb ar ddiwedd Undeb gofiadwy mai Duw ei hun, trwy farwolaeth ei fab Iesu Grist, oedd yn adeiladu ei Eglwys, a ninnau'n feini bywiol iddo. Byddai'r eglwys yn llwyddo pan fyddem wedi cysegru ein hunain yn ebyrth byw iddo a chariad Crist yn ein cymell ymlaen wrth wisgo'i gyfiawnder a chyflwyno gwerthoedd ardderchog Duw i eraill.

Arddangosfa Gwaith Llaw: Yn yr Hen Ysgol, sef Ffestri Eglwys Croes-goch, trefnwyd arddangosfa arbennig o waith llaw cywrain chwiorydd yr eglwys, o dan arweiniad Mrs Tina Morse. Fe'i gosodwyd ar y muriau a phob darn o'r gwaith yn ddehongliad unigryw o thema'r gynhadledd, 'Adeiladaf fy Eglwys'. Roedd yr arddangosfa yn wledd i'r llygaid.

Daeth y gynhadledd i ben o gwmpas y byrddau yng ngwesty Crug Glas gyda chinio blasus. Bu eglwysy'r ofalaeth yn hael eu croeso trwy gydol y cyfarfodydd a'r cyfan yn hynod fendithiol. Bu'n Undeb i'w chofio.

Bonni Davies

Codi arian ym Mhwllheli

Nid dim ond yn ystod trydedd wythnos mis Mai y bydd Pwllheli'n casglu arian at Gymorth Cristnogol. Yn ystod Hydref 2023 cyflawnodd Nia Wyn Williams, y Drindod, gamp arbennig trwy redeg hanner marathon yng Nghaerdydd gan godi £3,610.

Yna, cyflawnodd 70k yn ystod Mai eleni gan godi swm sylweddol eto o £1,355 (mwy i ddod). Gwych oedd gweld lluniau o Nia'n rhedeg ac yn cael ei chyf-weld ar raglen *Dechrau Canu*, *Dechrau Canmol* ar nos Sul yn ddiweddar gan roi Pwllheli ar y map.

Y Grawys

Ers blynnydoedd bellach, bydd eglwys St Pedr yn trefnu Cinio Grawys bob dydd Llun yn ystod tymor y Grawys gan gyfrannu swm sylweddol o arian at Gymorth Cristnogol. Bydd cyfraniadau oedfaon undebol yn ystod y cyfnod (ynghyd ag oedfa undebol y Pasg) hefyd yn mynd at yr un achos.

Wythnos Cymorth Cristnogol

Fe gawsom dywydd ardderchog yn ystod y drydedd wythnos o fis Mai eleni. Tywydd i godi calon ac ennyd

brwdfrydedd yn wir. Dechreuwyd yr wythnos gyda gweithgaredd Clwb Plant y Drindod ar y nos Lun. Noson o gemau a chwis, gyda rols selsig a chig moch ynghyd â phaned dan ofal Nia a'r Parchg Bryn Williams. Os na fuoch yno, cawsoch golled! Bu casglu arian ar y stryd ddydd Mercher mewn heulwen braf, bore coffi ym Mhenlan ddydd Gwener a thaith gerdded hamddenol fore Sadwrn. Daeth ein hymdrechion i ben ar y bore Sul, gyda gwasanaeth undebol dwyieithog yn y Drindod o dan ofal y Parchg Bryn Williams. Da oedd croesawu bron i 100 o bobl o eglwysi Pwllheli a gofalaeth Bryn i'r oedfa.

Yn ystod yr wythnos cawsom gyfle i ddangos gwerthfawrogiad o waith diflino L. Pritchard, sydd wedi ymdeol o fod yn ysgrifennydd ar ôl 30 mlynedd o wasanaeth. Diolch cywiraf i Valerie Williams am gytuno i fod yn ysgrifennydd dros dro. Ar hyn o bryd cyfanswm y swm a gasglwyd yn ystod Mai eleni yw £4,656.17.

Glenys Jones
Pwllheli



Caniadaeth y Cysegr

Sul, 28 Gorffennaf, am 7:30yb a 16:30yp

Amrywiaeth o emynau yng nghwmni Sally Harper

Oedfa Radio Cymru

Sul, 28 Gorffennaf, am 12yp

Oedfa dan ofal Anna Huws, y Bala

LLYFRAU NEWYDD I BLANT - 2024

HEFYD AR GAEL YN FUAN:

Cyhoeddiadau'r Gair

LLYFRAU NEWYDD HAF '24

Cyhoeddiadau'r Gair

COFIWCH HEFYD AM:



O'r galon



Cewch wybod y gwirionedd

“Yna dywedodd Iesu wrth yr Iddewon oedd wedi credu ynddo, ‘Os arhoswch chwi yn fy ngair i, yr ydych mewn gwirionedd yn ddisgyblion i mi. Cewch wybod y gwirionedd, a bydd y gwirionedd yn eich rhyddhau.’ ” (Ioan 8:31–2, BCND)

Y tro diwethaf trafodais ‘Beth ddywed ein calon am gariad?’ gan ystyried ein calon fel gardd. Fel ym mhrofiad pob garddwr, mae’n frwydr barhaus yn erbyn chwyn, sef rhyw blanhigyn sy’n tyfu lle nad oes mo’i eisiau, gan ei fod yn dwyn lle, yn cystadlu â’r hyn ddylai dyfu a dwyn harddwch neu ffrwyth oddi wrth hwnnw. Felly, i’r Cristion mae’r frwydr yn erbyn y chwyn y mae’r un drwg yn ei hau yn ein calon, sy’n llesteirio a thagu twf ffrwyth yr Ysbryd ynom ac yn dwyn ein llawenydd a’n tangnefedd.

Beth i’w blannu?

Wedi delio (yn barhaus) â’r chwyn, pa wirionedd ddylid ei blannu a’i feithrin yn ein calon a’n meddwl? Fel yr awgrymais y tro diwethaf, mae Paul yn rhoi ateb cyffredinol yn Philipiaid 4:8: “Beth bynnag sydd yn wir, beth bynnag sydd yn anrhydeddus, beth bynnag sydd yn gyfiawn a phur, beth bynnag sydd yn hawddgar a chanmoladwy, pob rhinwedd a phopeth yn haeddu clod, myfyriwch ar y pethau hyn.”

Dyma lle bu ein cyndadau’n llawer gwell na ni, yn ein trwytho yng ngwirioneddau ein ffydd drwy’r Hyfforddwr a’r Rhodd Mam. Plannu’r gwir ynom yn gynnar a’i ategu’n rheolaidd. Mae dysgu drwy ‘holi ac ateb’ yn faes eang i’w drafod, ond a’ i ddim pellach am y tro. Wrth gwers, mae gennym y Beibl i’w ddarllen a llawer o adnoddau i’n cynorthwyo. Yn ogystal, mae defnydd defosiynol o’n hemynau yn gymorth, am ei fod (tan yn ddiweddar) yn fodd o drosglwyddo gwirioneddau mawr a phrydferth i’n calon a’n profiad.

Ystyriwch ddant y llew


‘Ystyriwch y lili,’ meddai Iesu. Pam, felly, ystyried dant y llew? Onid chwyn trafferthus ydyw? Wel, ie a nage. Dyma rwyf wedi ei ddysgu am y planhigyn di-ildio hwn:

- yn Llydaw, defnyddir y dail danheddog mewn salad am eu bod yn llawn maeth ac yn flasu;
- mae’r blodau’n ffynhonnell gynnar bwysig o baill a neithdar i’r gwenyn;
- mae ei bresenoldeb yn medru arwyddo diffyg yn y pridd.

Y pwynt olaf dwi am awgrymu sy’n gymorth i ni yn bennaf. Ond mae’r ddau bwynt cyntaf yn gymorth i ddangos nad oes raid i’r ‘chwyn’ yn ein calon fod yn ddrwg i gyd. Fe all eu bod yn cael gormod o le neu bwyslais ac yn goddiweddyd gwirioneddau eraill sy’n ceisio tyfu.

Ond yn ôl at y pwynt olaf. Lle nad oes cydbwysedd yn y pridd, fe all fod yn brin o fwynau hanfodol i’r planhigion llai gwydn dyfu, a’r pridd wedi’i gywasgu. Sylwch ar dir diffaith fel hyn a buan y gwelwch fod ‘chwyn’ yn cael gafael yno.

O feddwl fel hyn, gallwn droi’r ‘broblem’ o chwith, fel petai, a sylwi bod y chwyn yn dangos beth sydd o’i le ar y pridd. Dyma



Llun: Dora Dalton, Unsplash.com

ryfeddod dant y llew! Mae’n arwydd o ddiffyg haearn yn y pridd, ond mae’n gallu tyfu gwreiddyn dwfn a thrwchus (hen elyn y garddwr!) gan dynnu’r mwyn i’r wyneb yn ei ddail. Dros amser, wrth i’r dail wywo a dychwelyd i wyneb y pridd, mae’n ffrwythloni’r pridd hwnnw i’r planhigion eraill o’i gwmpas. Mae’r gwreiddyn hefyd yn agor y pridd i’r aer a’r dŵr fedru treiddio iddo. Gellir dysgu gwersi tebyg am ddail tafol, danadl poethion a nifer helaeth o chwyn.

Beth yw’r wers?

Yn syml, mae’r celwydd neu’r chwyn y mae ein calon yn ei goleddu, ac sy’n peri’r ffasiwn niwed, yn dangos pa feddyginiaeth sydd ei hangen. Rhof enghraifft bersonol i chi. Roedd drych ar y wal yn ein tŷ ni wrth i mi dyfu. A phob tro y gwelwn fy hun ynddo, adroddwn i mi fy hun mor hyll yr oeddwn, ac mai go brin y byddai neb yn fy ngharu. Dyna oedd y chwyn, a’r hyn yr oedd yn ei arwyddo oedd fod yna ddiffyg yn y ffordd y gwelwn fy hun. A’r gwirionedd a drodd yn feddyginiaeth ffrwythlon oedd dysgu a gwybod y gwirionedd fy mod wedi fy nghreu a’ m gwaredu ar ei lun a’i ddelw Ef ei hun, a’i fod yn f’ystyried ddigon i farw yn fy lle i’ m prynu iddo’i hun, Haleliwia!

Hywel Rhys Edwards

Cyhoeddir *Cenn@d* ar y cyd gan Eglwys Bresbyteraidd Cymru ac Undeb Bedyddwyr Cymru. Oni nodir yn wahanol, nid yw barn cyfranwyr *Cenn@d* yn cynrychioli barn swyddogol Eglwys Bresbyteraidd Cymru nac Undeb Bedyddwyr Cymru. Gallwch anfon eich cyfraniadau / gohebiaethau / ymholiadau at:

huw@cennad.cymru | aled@ysgolsul.com

www.cennad.cymru



CennadCymru



@CennadCymru